

# 2 CORINTHIANS

## Di lua lede a Paul ang gi di Nohongo Dabu i Corinth

### Di haga modongoohia

*Di lua lede a Paul ang gi di Nohongo Dabu i Corinth* la ne hihi i lodo di madagoa haingadaa huoloo i mehanga ia mo di nohongo dabu deela. Hunu gau mai i di nohongo dabu o Corinth e hai baahi maaloo dangihi ang gi Paul, gei mee e haga modongoohia aga hagamahi bolo ginaadou e hai gi humalia nadau mehanga mo di noho tentene, gei mee e haga modongoohia aga dono tentene ma ga gila humalia nia mee aanei.

I lodo taamada o di lede deenei, Paul e helekai aga nia hai i mehanga ia mo di nohongo dabu o Corinth. Paul e haga dondonu aga dono hai baahi i dana lede i mua i tee buni dela ne gila aga i di nohongo dabu, mo dono tentene huoloo ang gi nadau lodo gu huli hoou, mo di noho manawa lamalia i nadau mehanga. Gei nomuli, gei mee ga dangi hagamahi ang gi di nohongo dabu bolo digaula gi hagamahi gi di nadau hai tigidaumaha e hagamaamaa ai nia dama a Christ ala i Judea.

I lodo nia mada hagaodi o di lede deenei, gei Paul e hagamahi e daa ia i dono duhongo hegau tangada agoago hagau, idimaa, hunu gau i lodo Corinth e haihai bolo ginaadou ala go digau agoago hagau donu, gei Paul la tangada agoago hagau tilikai.

### Di hagahonu di beebaa deenei:

Di haga modongoohia (1.1-11)

Paul mo di nohongo dabu Corinth (1.12-7.16)

Tigidaumaha e hagamaamaa nia dama a Christ i Judea (8.1-9.15)

Paul e abaaba ia mo dono duhongo tangada agoago hagau (10.1-13.10)

Di hagaodi o di lede deenei (13.11-13)

**1** <sup>1</sup> Mai baahi o Paul, tangada agoago hagau a Jesus Christ mai i di hiihai o God, mo mai tadau duaahina go Timothy, ang gi di nohongo

dabu a God i Corinth, mo ang gi nia dama a God huogodoo ala i Achaia.<sup>a</sup>  
<sup>2</sup>God tadau Damana mo tadau Dagi go Jesus Christ gi gowadu gi goodou tagaloaha mo di noho i di aumaalia.

### Di danggee a Paul ang gi God

<sup>3</sup>Hagaamuina a God go Tamana o tadau Dagi go Jesus Christ, go Tamana dela e honu i tumaalia, go di God e loomoi ai nia hagamaamaa huogodoo. <sup>4</sup>Go mee e hagamaamaa gidaadou i tadau haingadaa huogodoo, bolo gidaadou gi mee di hagamaamaa labelaa ginaadou ala gu noho i lodo nia haingadaa huogodoo, gi hai hegau gi nia hagamaamaa huogodoo ala ne kae go gidaadou mai baahi o God. <sup>5</sup>Gadoo be tadau dau ang gi nia hagaduadua o Christ, gei gidaadou e dau labelaa gi di hagamaamaa a God mai i Christ. <sup>6</sup>Maa gimaua e hagaduadua, e hai belee hagamaamaa goodou mo di haga mouli. Gei maa di hagamaamaa humalia gu gaamai gi gimaua, gei goodou e manawa lamalia labelaa gi di hagamaamaa deenei, ge e hai goodou gi lodo maaloo gi mee di godou hagakono i nia haingadaa beenei ala nogo hagakono go gimaua. <sup>7</sup>Gei di mau hagadagadagagee adu gi goodou la koia e maaloo dangihi, idimaa, gimaua e iloo bolo ma goodou e hai mee dalia gimaua gi nia hagaduadua aalaa, gei goodou e hai mee dalia gimaua labelaa gi di hagamaamaa dela e kae go gimaua. <sup>8</sup>Au e haga langahia adu gi goodou, ogu duaahina nei, i nia haingadaa ala ne tale mai gi gimaua i Asia. Nnagadilinga haingadaa kono gu hagahuaidu huoloo gimaua, gu deai di mau hagadagadagagee bolo gimaua ga mouli.<sup>b</sup> <sup>9</sup>Gimaua gu hai hua bolo gimaua ga mmade, gei nia mee aanei ne hai mai gi gimaua bolo gimaua gi hudee hagadagadagagee hua mai gi gimaua, go God hua dela e mee di haga mouli aga digau gu mmade. <sup>10</sup>Go mee dela ne haga dagaloaha gimaua mai i nia hagalliga o di made beenei, gei mee ga haga dagaloaha gimaua, gei gimaua e hagadagadagagee bolo mee ga haga dagaloaha labelaa gimaua, <sup>11</sup>i di godou hagamaamaa gimaua i godou hai dalodalo. Nia dalodalo o digau dogologo le e kila humalia, gei God ga hila mai gi gimaua, gei digau dogologo ga haga hagaamu a God i dana hai dela ne haga dagaloaha gimaua.

### Di huli o di bilan a Paul

<sup>12</sup>Gimaua e tentene, idimaa, mau hagamaanadu gu haga modongoohia aga bolo gimaua e heehee hua i mua nia hadumada o God i henuailala nei, gei e donu mau hegau adu gi goodou, hagalee mai i nia kabemee o henuailala, gei mai i tumaalia o God. <sup>13</sup>Gimaua e hihi hua adu gi goodou nia mee ala e mee di godou dau gei e donu ginai, gei au

<sup>a</sup> 1.1: Acts 18.1    <sup>b</sup> 1.8: 1 Cor 15.32

e hagadagadagagee bolo goodou ga donu humalia ginai. <sup>14</sup>Maeaha maa goodou digi modongoohia humalia gimaua dolomeenei, au e hagadagadagagee bolo maalia gei goodou ga modongoohia humalia gimaua, bolo goodou ga mee di godou tentene i gimaua, gadoo be di mau tene adu gi goodou i di laangi o tadau Dagi go Jesus. <sup>15</sup>Di hagadagadagagee deenei, gei au gu hagababa bolo au e hanadu gi godou baahi, bolo goodou gi kae di godou haga maluagina haga lua. <sup>16</sup>Au gu hagababa bolo au e hanadu gi godou baahi i mua dogu hana gi Macedonia, mo dogu hanimoi labelaa i Macedonia, e kae dogu hagamaamaa mai i godou baahi i dogu ala dela belee hana gi Judea.<sup>c</sup> <sup>17</sup>Dagu hagatau deenei, gei au gu hai be tangada e logo manawa? E hai behe? Goodou e maanadu bolo dagu hai agu maanadu aanei, au ne hai hua bolo gi haingoohia mai gi di au i dagu hai bolo “Uaa” mo “Deeai” i di madagoaa hua e dahi? Deeai! <sup>18</sup>Gadoo be God dela e helekai donu, dagu hagababa adu gi goodou la hagalee go di “Uaa” mo di “Deeai”. <sup>19</sup>Idimaa, Jesus Christ go Tama daane a God dela gu agoago ai a Timothy, Silas mo au, adu gi goodou, la hagalee go di “Uaa” mo di “Deeai,” gei go mee dela go di “Uaa” donu a God.<sup>d</sup> <sup>20</sup>Idimaa, go mee dela go di “Uaa” i nia hagababa huogodoo a God. Deenei laa tadinga o tadau helekai i di ingoo o tadau Dagi go Jesus Christ, e hai bolo “Amen”, e hai ai di haga madamada o God.<sup>e</sup> <sup>21</sup>Ma go God donu hua dela ne hai gidaadou ngaadahi gi modongoohia di mouli buni ang gi Christ. Gei go God donu hua dela ne dugu gidaadou dagidahi, <sup>22</sup>gei gu bigi gidaadou gi di hagailongo dela e hai gidaadou gi hai nia dama ni aana, ge gu haga ulu di Hagataalunga Dabu gi tadau lodo, e hai ai di hagadootonu nia mee huogodoo ala gu hagatogomaalia mai gi gidaadou. <sup>23</sup>Au gu gahigahi a God e hai dogu hagadootonu, idimaa, go mee dela e iloo ia i dagu hai dela gu hagamaanadu bolo au gi hudee hanadu gi godou baahi i Corinth bolo gi dee haga lodo huaidu hua goodou. <sup>24</sup>Gimaua hagalee hiihai e hai di mau haganoho adu gi goodou i di hai o di godou hagonu, idimaa, godou hagonu la koia e maaloo. Gei gimaua e ngalua labelaa madalia goodou adu hua gi di godou tene.

**2** <sup>1</sup>Au gu hagamaanadu bolo au hagalee gila adu gi godou baahi, gi dee manawa gee goodou. <sup>2</sup>Maa au ga haga lodo huaidu goodou, malaa, koai dela ga mee dana haga tentene au? Go goodou hua ala ne hagahuaidu ko au! <sup>3</sup>Deenei laa dagu mee ne hihi adu gi goodou dagu lede deelaa. Au nogo hagalee hiihai e hanadu gi goodou, bolo au ga lodo huaidu gi di mee i godou baahi, idimaa go goodou ala go agu gau e maanadu bolo e haga tentene au. Au e iloo bolo au ma ga manawa

<sup>c</sup> 1.16: Acts 19.21    <sup>d</sup> 1.19: Acts 18.5    <sup>e</sup> 1.20: Tadinga di bida helekai *amen* le e hai bolo “e donu”

lamalia, gei goodou hogi e manawa lamalia. <sup>4</sup>Deenei laa, au gu hihi adu gi goodou dagu lede i lodo dogu manawa gee, gei e dangi ogu lodo, hagalee bolo au e hagahuaidu goodou, gei bolo goodou gi longono ai godou lodo i dogu aloho i goodou.

### Dumaalia ang gi tangada dela gu ihala

<sup>5</sup>Malaa, maa iai tangada gu haga manawa gee dana dangada i goodou, hagalee ne hai di maa mai gi di au, geia ne bida hagahuaidu hua goodou huogodoo, be hunu goodou. (Au e helekai beenei, idimaa au e de hiihai di helekai daamaha i mee.) <sup>6</sup>Gei dono hagaduadua dela ne kae mai godou baahi dogologo, la gu dohu hua gi mee. <sup>7</sup>Deenei laa, goodou gi dumaalia gi hagamaamaa ina a mee, gi dee damanaiee hua ono lodo huaidu, ga hagahuaidu dono mouli. <sup>8</sup>Au e dangidangi hagamaha adu gi goodou bolo goodou gi heia a mee gi iloo bolo goodou e aloho i deia. <sup>9</sup>Idimaa, deenei tadinga dela ne hihi ai dagu lede, ga hagau adu gi goodou, bolo gi iloo eau be goodou gu tuu maaloo ge gu daudali agu agoago i nia madagoaa huogodoo. <sup>10</sup>Maa goodou ga dumaalia gi tangada i dana mee dela ne hai, gei au e dumaalia labelaa gi mee. Maa au ga dumaalia, be di maa di mee i golo belee dumaalia iei au, gei au e hai di maa i mua nia golomada o Christ i goodou, <sup>11</sup>bolo gi dee maaloo hua Satan i gidaadou, idimaa, gidaadou e iloo hua ana hagamaanadu huaidu.

### Paul e dee noho maalia i Troas

<sup>12</sup>I dogu dau adu gi Troas belee hana e agoago di Longo Humalia o Christ, gei au ga gidee bolo Dimaadua gu huge mai di bontai humalia belee hai agu hegau i golo.<sup>f</sup> <sup>13</sup>Gei au e de nnoomaalia ogu lodo, i di au e de gidee au tadau duaahina go Titus i di gowaa deela, gei au ga hagaaloho gi digaula ga hana gi Macedonia.

### Gu aali mai i Christ

<sup>14</sup>Gidaadou ga danggee ang gi God, go mee dela e dagidagi gidaadou i tadau aali i baahi o Christ, ga hai gidaadou gi iloo dono maalama, gi hagadele ina ang gi nia daangada huogodoo, gi hai gadoo be di kala o di lolo kala, dela ma ga modoho dono kala gi daha ang gi nia gowaa huogodoo. <sup>15</sup>Idimaa, gidaadou gu kala ang gi God i di kala o Christ. Di kala deenei ga modoho ang gi digau ala ga dagaloaha, mo ang gi digau ala ga kili gi daha. <sup>16</sup>Gidaadou e hai gadoo be di bilau o tangada made ang gi digau ala ga kili gi daha, gei gidaadou e hai gadoo be di lolo kala o di mouli ang gi digau ala ga dagaloaha. Malaa, koai dela e mee di hai tegau deenei? <sup>17</sup>Gimaua hagalee hai be digau dogologo ala e haihai

<sup>f</sup> 2.12-13: Acts 20.1

nadau mee dilikai gi nnelekai a God, e halahala ai nadau hagahumalia. Gei gimaua e agoago gi donu i mua nia golomada o God dela ne hagau mai gimaua, gadoo be nia hege ni Christ.

### Digau hai hegau o di hagababa hoo

**3** <sup>1</sup>Malaa e hai behee, gimaua gu hai be digau e bida hagaamu gimaua? Be gimaua gu hai be digau ala i golo ala e hiihai gi di lede haga modongoohia adu gi goodou, be di lede mai godou baahi? <sup>2</sup>Ma go goodou ala go mau lede haga modongoohia, ala gu hihi gi lodo mau manawa, gu iloo ge gu mee di dau go nia daangada huogodoo. <sup>3</sup>Ma gu modongoohia hua bolo ma go Christ dela ne hihi di lede deenei, ga gowadu go gimaua. Di lede deenei hagalee ne hihi gi nia inki, gei ne hihi gi di Hagataalunga o di God Mouli. Hagalee ne hihi gi hongo nia baahi hadu, gei ne hihi gi lodo nia hadu manawa o nia daangada.<sup>g</sup> <sup>4</sup>Gimaua e helehelekai beenei, i mau hagadagadagagee huoloo gi God mai i Christ. <sup>5</sup>Gimaua hagalee ne wouwou ga mee ai di hagamaanadu di mee mai i gimaua. Gei di mau kabemee dela ga mee di hai mau mee, la ne daamada mai baahi o God. <sup>6</sup>Ma go mee dela ne hai gimaua gi hai digau e mee di hagadele di hagababa hoo, hagalee go di hagababa dela ne hihi gi nnaganoho gei di hagababa o di Hagataalunga Dabu, idimaa, nnaganoho ala ne hihi, le e hidi mai di made, gei di hagababa hoo o di Hagataalunga Dabu, le e hidi mai di mouli.<sup>h</sup> <sup>7</sup>Nnaganoho ala ne hihi gi di gili nia hadu le e madamada huoloo i di madagoaa nia maa ne gaamai gi nia dama o Israel, gei digaula gu deemee di mmada adu gi nia golomada o Moses, idimaa di madamada dela gu i-di gili ono golomada, gei di madamada deenei, le e odi gi daha, ga hagalee. Maa nnegau o nnaganoho ala e hidi mai di made, le e madamada huoloo beelaa,<sup>i</sup> <sup>8</sup>malaa e hai behee? Nnegau o di Hagataalunga Dabu hagalee koia e madamada gi nonua? <sup>9</sup>Maa nnegau o di hagi aga le e madamada, di madamada o nnegau ala e gaamai di mouli, la koia e madamada huoloo gi nonua. <sup>10</sup>Idimaa, di madamada o lodo di madagoaa i mua, la hagalee tau ang gi di madamada o di madagoaa dolomeenei. <sup>11</sup>Nia mee ala ne odi gi daha le e madamada, malaa di madamada o nia mee ala hagalee e odi gi daha, la koia e madamada huoloo gi nonua! <sup>12</sup>Deenei laa, gimaua e agoago adu gi goodou i di mau manawa maaloo, idimaa, gimaua iei di mau hagadagadagagee i golo i nia mee aanei. <sup>13</sup>Gimaua hagalee hai be Moses dela ne gahu dono libogo gi di gahu libogo, bolo gi dee mmada nia dama o Israel gi di madamada deelaa, dela ma ga odi gi daha, ga hagalee.<sup>j</sup> <sup>14</sup>Nadau lodo gu haga hamaaloo dangihi, ga dae mai loo gi dangi nei. Di

<sup>g</sup> 3.3: Ex 24.12; Jer 31.33; Ezek 11.19, 36.26    <sup>h</sup> 3.6: Jer 31.31    <sup>i</sup> 3.7: Ex 34.29

<sup>j</sup> 3.13: Ex 34.33

gahu libogo deela, le e duuli huaigolo nadau maanadu i di madagoaa ma ga dau di hagababa namua. Go Christ hua dela e mee di daa gi daha di gahu libogo deela. <sup>15</sup>Dangi nei, gei di gahu libogo la i-golo hua, dela e duuli nadau maanadu i di nadau madagoaa ma ga dau Nnaganoho Moses. <sup>16</sup>Gei di gahu e mee di daa gi daha, be di hai o di beebaa dela e helekai i Moses, “Dono gahu hii libogo e daa gi daha di madagoaa mee ga huli ang gi Dimaadua.”<sup>k</sup> <sup>17</sup>Dimaadua deenei la go di Hagataalunga Dabu. Di gowaa dela iai di Hagataalunga o Dimaadua, deela di gowaa iai di aumaalia. <sup>18</sup>Malaa, gidaadou huogodoo gu maahina i di madamada o Dimaadua i di hagalee gahu tadau hadumada, gei di madamada deela dela e hanimoi i baahi o Dimaadua, deela go di Hagataalunga dela e huli gidaadou gi hai be Dimaadua i di madamada dela e damana gi nonua.

#### Di maluagina i lodo di loaabi hadu

**4** <sup>1</sup>I lodo tumaalia o God, mee gu dugu mai di moomee deenei gi gimaua e hai, malaa, gimaua hagalee paagege. <sup>2</sup>Gimaua gu kili gi daha mau mee hagammuni mono mee haga langaadia huogodoo. Gimaua hagalee hai hegau hogi gi di hai kai tilikai, ge hagalee huli gee nnelekai a God. Gei gimaua e noho i lodo di maalama o di tonu i mua nia hadumada o God, e hagamahi e hai gimaua gi humalia gi nia maanadu o nia daangada huogodoo. <sup>3</sup>Maa e donu bolo di Longo Humalia dela e agoago go gimaua le e hagammuni, malaa, e hagammuni hua gi digau ala gu nngala. <sup>4</sup>Digaula hagalee hagadonu, idimaa, nadau hagabaubau la gu dugu i lodo di bouli go di god huaidu o henuailala. Mee e hai digaula gi deemee di mmada gi di maalama dela e inaina ginaadou, go di maalama o di Longo Humalia o di madamada o Christ dela e hai gadoo be God. <sup>5</sup>Gimaua hagalee bida haga modongoohia aga gimaua, gei e haga modongoohia hua Jesus Christ, dela go Tagi, gei gimaua la nia hege ni goodou mai di ingoo o Jesus. <sup>6</sup>God ne helekai, “Mai i lodo di bouli, di maalama gi maahina.” Ma go di God deenei la hua dela ne haga mamaalama tadau lodo, bolo gi iloo gidaadou di madamada o God dela e maahina i di gili nia hadumada o Christ.<sup>l</sup> <sup>7</sup>Gimaua ala e dadaahi di maluagina deenei i lodo di loaabi hadu dee mau, belee haga modongoohia ai bolo di mogobuna aamua la di mee hua ni God, hagalee ni gimaua. <sup>8</sup>Nnagadilinga haingadaa e logowaahee e dau i gimaua, gei deai dono lauwa i gimaua ai. Gimaua gu manawa logo i hunu madagoaa, gei gimaua iei di mau hagadagadagagee i golo. <sup>9</sup>Mau hagadaumee e logowaahee i golo, gei gimaua hagalee bolo gu mada gimaua hua. Hunu madagoaa gei gimaua e lauwa, gei digi lauwa llauehe. <sup>10</sup>Nia madagoaa

<sup>k</sup> 3.16: Ex 34.34 <sup>l</sup> 4.6: Gen 1.3

huogodoo gei gimaua e dagidagi di hagaduadua o Christ mo dono made i mau huaidina, bolo dono mouli hogi gi gila aga i mau huaidina. <sup>11</sup>I lodo mau mouli, gei gimaua e noho i lodo di haga lliga o di made i nia madagoaa huogodoo i nnegau a Jesus, bolo dono mouli gi gila aga i mau huaidina. <sup>12</sup>Malaa, deenei le e hai bolo di made la dela e ngalua i mau baahi, ge di mouli la dela e ngalua i godou baahi. <sup>13</sup>Di Beebaa Dabu e helekai boloo, “Au gu hagadonu, dela dagu mee e helekai iei au.” Go di hagadonu deela, dela e helehelekai iei gimaua, idimaa, mau hagadonu i golo.<sup>m</sup> <sup>14</sup>Gimaua e iloo bolo God dela ne haga mouli aga tadau Dagi go Jesus, mee ga haga mouli aga labelaa gimaua madalia Jesus, ga hai gidaadou gi tuu i ono mua. <sup>15</sup>Nia mee huogodoo ala ne hai i mau baahi la ne hai i goodou, bolo tumaalia o God la gi damanaiee gi dae ang gi digau dogologo, e haga gila ai di hagaamu tumaalia e hai ai di danggee gi God.

### Mouli i di hagadonu

<sup>16</sup>Deenei di mau mee digi madugia ai. Mau huaidina la ga paagege, gei mau hagataalunga le e haga hooi i nia laangi huogodoo. <sup>17</sup>Tama haingadaa duli loo dela e hagaduadua ai gimaua i nia laangi aanei, ga hidi mai ai di madamada dee odi, koia e humalia huoloo i nia haingadaa o henuailala. <sup>18</sup>Gimaua hagalee daumada nia mee ala e kila mai, gei gimaua e daumada nia mee ala hagalee kila mai. Idimaa, nia mee ala e kila mai, e noho hua i di madagoaa bodobodo, gei nia mee ala hagalee kila mai, e noho hua belaa, hagalee e odi.

**5** <sup>1</sup>Gidaadou gu iloo bolo di hale go tadau huaidina dela e noho ai gidaadou nolodo, la di mee ni henuailala, gei dono madagoaa ma ga mooho, God ga dugu mai gi gidaadou di hale i di langi belee noho ai gidaadou. Di hale deenei e deai dono hagaodi ai. <sup>2</sup>I hongo henuailala nei gidaadou e hiihai huoloo bolo gidaadou e ulu gi di hale dela mai i di langi. <sup>3</sup>Maa gidaadou ga ulu gi tadau hale mai i di langi, gei gidaadou ga iloo bolo gidaadou tadau huaidina i golo. <sup>4</sup>Tadau madagoaa ala e noho i lodo di hale henuailala nei, gei gidaadou e hidi gaagaa, gei e manawa gee huoloo, gei hagalee bolo gidaadou e hiihai e kili gi daha tadau huaidina henuailala nei, gei go tadau hiihai huoloo bolo gidaadou e ulu gi tuaidina mai i di langi, e huli ai tuaidina made ang gi tuaidina mouli. <sup>5</sup>Ma go God dela ne hagatogomaalia gidaadou gi di huli deenei, gei deenei go mee dela ne gaamai gi gidaadou dono Hagataalunga belee hai ai di mee e haga modongoohia ana mee huogodoo ala ga gaamai gi gidaadou. <sup>6</sup>Deenei di mee e maaloo i tadau lodo i nia madagoaa huogodoo. Gidaadou gu donu bolo gidaadou ma ga noho hua i lodo tuaidina o henuailala, gidaadou digi noho i baahi o Tagi i dono lohongo i

<sup>m</sup> 4.13: Ps 116.10

di langi. <sup>7</sup>Idimaa, gidaadou le e mouli mai i di hagadonu, gei hagalee mai i nia mee ala e gidee gidaadou. <sup>8</sup>Tadau lodo e maaloo hua, gei gu hiihai bolo gidaadou e ulu gi daha mo tuaidina nei, gi hula gidaadou gi noho i tadau hale dela i baahi o Tagi. <sup>9</sup>Tadau mee e hiihai gi hai i mua, la belee haga tentene di manawa o Tagi, maeaha maa gidaadou e noho i lodo tadau hale i henuailala nei, be e noho i tei gowaa. <sup>10</sup>Idimaa, gidaadou huogodoo e hai gi hula gi di hagi aga i mua o Christ, tangada nei mo tangada nei e kae dono duhongo gi tau gi ana hangaahai humalia be huaidu ala nogo hai i dono madagoaa nogo i henuailala.<sup>n</sup>

### Di hagadau ihoo gi God mai i Christ

<sup>11</sup>Gimaua e iloo tadinga o di mmaadagu i Dimaadua, gei gimaua e hagamahi e hai gi nia daangada gi hiihai gi di hai deenei. God e iloo ia hua gimaua, gei au e hagadagadagee bolo goodou hogi e iloo hua au i lodo godou manawa. <sup>12</sup>Gimaua hagalee hai bolo goodou gi hagaamuina gimaua. Gimaua e hagamada e hai adu gi goodou di mee dela ga hgapuu ai goodou mai gi gimaua bolo gi mee ai goodou di helekai gi digau ala e bida hgapuu gi nadau mee ala e gidee, gei hagalee go nia mee donu mai i lodo nadau manawa. <sup>13</sup>Maa nei bolo gimaua gu hai nia daangada dadaaulia, go God dela ne dadaaulia ginai gimaua. Maa gimaua gu kabemee, go goodou ala ne kabemee ginai gimaua. <sup>14</sup>Ma go di aloho o Christ dela e hagangalungalua gimaua, i di mau modongoohia di agoago deenei: Tangada e dahi ne made ang gi digau huogodoo, deenei dono hadinga bolo nia daangada huogodoo le e hai mee gi dono made. <sup>15</sup>Mee ne made gi nia daangada huogodoo, bolo nia daangada huogodoo ala e mouli gi hudee bida mouli hua ang gi ginaadou, gei gi mouli ang gi tangada dela ne made ga mouli bolo gi mee ginaadou di mouli. <sup>16</sup>Geinga dolomeenei ga hana, gei gidaadou ga hagalee hagi aga tangada be go nia hagamaanadu o tangada. Maeaha maa gidaadou gu hagi aga a Christ i mua be di hagamaanadu o tangada, dolomeenei gei gidaadou gu hagalee hai beelaa. <sup>17</sup>Tangada dela gu hai di tama ni Christ, geia gu hai tangada hoou. Nia mee namua gu hagalee i dono baahi, gei nia mee hoou gu kila aga. <sup>18</sup>God ne hai nia mee aanei huogodoo, ne huli gidaadou ala nogo hai nia hagadaumee, gi hai ono ehoo hagaaloho mai i Christ, gei gu dugu mai labelaa tadau duhongo hegau e hai nia daangada ala i golo gi hai labelaa nia hoo hagaaloho ni oono. <sup>19</sup>Deenei laa, di haga honu o mau agoago bolo God ne hai nia daangada huogodoo belee hai ono ehoo hagaaloho mai i Christ. Gei mee hagalee dau anga nadau huaidu gi ginaadou, ge ne dugu mai gi gimaua nnelekai ala e haga modongoohia di hai ne hai digaula gi hai ono ehoo hagaaloho. <sup>20</sup>Deenei laa, aanei

<sup>n</sup> 5.10: Rom 14.10

gimaua e agoago mai i Christ, e hai be di mee bolo God e hagi adu dono hiihai gi goodou mai mau agoago. Gimaua e tangi hagamahi i di ingoo o Christ adu gi goodou bolo goodou gi huli gi hai nia hoo hagaaloho ni God. <sup>21</sup>Christ la ono huaidu ai, gei God gu hai a mee gi hai mee gi tadau huaidu, bolo gi mee ai di hai mee gi di di tonu o God i tadau buni gi Christ.

**6** <sup>1</sup>Gidaadou nogo madalia a God nogo hai ana hegau, deenei laa, gimaua e dangidangi adu bolo goodou gi hudee haga balumee ina dono dumaalia, dela gu lawa di godou kae. <sup>2</sup>Hagalongo gi nia helekai a God,

“Dogu madagoaa dela belee dumaalia adu gi di goe, gei au gu longono eau goe.

Dogu laangi dela belee hagamouli goe, gei au gu hagamaamaa goe.”<sup>o</sup>

Hagalongo mai: deenei la di madagoaa belee kae tumaalia o God, dangi nei la di laangi belee haga mouli goe!

<sup>3</sup>Gimaua hagalee hiihai gi tangada gi gida dana mee hala i mau moomee, deenei di mau mee e de hiihai di haga deaadee dahi dangada. <sup>4</sup>Gei gimaua gu haga modongoohia aga bolo gimaua nia daangada hai hegau ni God i nia mee huogodoo aanei: e manawa hagakono i mau hagaduadua, mo mau haingadaa, mo mau lodo boo. <sup>5</sup>Gimaua gu haga mamaawa, gu galabudi, gu dadaaligi go digau dogologo, gu ngalua kono, gu haga ala i di boo, ge gu noho mau meegai ai.<sup>p</sup> <sup>6</sup>Gimaua gu haga modongoohia aga gimaua, bolo gimaua nia daangada hai hegau ni God mai i mau mouli madammaa, iloo nia mee, hagakono, humalia, mai di Hagataalunga Dabu, mai mau aloho donu, <sup>7</sup>mo mai i di mau hagadele nnelekai ala e donu, mo nia mogobuna o God. Gimaua e daahi nia goloo dauwa o di tonu i mau lima gau donu mo gau ihala. <sup>8</sup>Gimaua e kae di hagabalagau, gei e kae di haga langaadia, e kae nnelekai huaidu mo di hagaamu labelaa. Nia daangada e hai bolo gimaua digau hagadele tilikai, gei gimaua e helekai donu. <sup>9</sup>Digaula e hai bolo gimaua nia balu daangada, gei gimaua e dahidamee i baahi nia daangada huogodoo. E hai gadoo be gimaua digau gu mmade, gei deesai, gimaua e mouli hua. Maeaha maa gimaua gu kae di hagaduadua, gei gimaua digi mmade. <sup>10</sup>Maeaha maa gimaua e lodo huaidu, gei gimaua e tentene hua i nia madagoaa huogodoo. Gimaua e hai be digau hagaloale, gei gimaua e haga maluagina digau dogologowaahae. Gimaua e hai be digau nadau goloo ai, gei gimaua e hai mee gi nia mee e logo. <sup>11</sup>Goodou go digau Corinth, gimaua e helekai donu adu gi goodou i di tonu, gimaua gu haga mahuge adu gi goodou nia haga honu o mau manawa. <sup>12</sup>Ma hagalee go

<sup>o</sup> 6.2: Is 49.8    <sup>p</sup> 6.5: Acts 16.23

gimaua ala gu tai mau manawa i goodou, go goodou hua ala gu tai godou manawa i gimaua. <sup>13</sup>Au e helekai adu gi goodou be nia dama ni aagu. Goodou labelaa hai be di mau hai adu gi goodou gi haga mahuge ina gi daha godou manawa!

### Hudee haga puni ang gi digau o di bouli

<sup>14</sup>Goodou hudee haga puni ang gi digau ala hagalee hagadonu, idimaa, e deemee di hai beenei. Di tonu e deemee di haga puni ang gi di haihai hala. Di maalama e deemee di haga puni ang gi di bouli. <sup>15</sup>Christ mo Satan e deemee di donu gi dahi mee. Tangada hagadonu mo tangada de hagadonu e deemee di hai mee gi di mee e dahi. <sup>16</sup>Di Hale Daumaha o God mo nia balu god e deemee di haga puni. Idimaa, aanei go gidaadou di hale daumaha a God Mouli, be di hai a God dela ne helekai boloo,<sup>q</sup>

“Au ga hai dogu hale i nadau baahi, gei au ga noho i baahi digaula. Au ga hai di God ni digaula, gei digaula ga hai nia daangada ni aagu.

<sup>17</sup>Dimaadua gu helekai boloo, Goodou gi huli gi daha mo digaula, gei gi maawae gi daha mo digaula. Goodou hudee tale gi nia mee gulugulua i baahi digaula, gei au ga madamada humalia i goodou.<sup>r</sup>

<sup>18</sup>Au ga hai di godou Damana, gei goodou ga hai nia dama daane mo nia dama ahina ni aagu, be di hai o Dimaadua Aamua Huoloo ne helehelekai ai.”<sup>s</sup>

**7** <sup>1</sup>Ogu ihoo hagaaloho, nia hagababa huogodoo aanei ne hai mai gi gidaadou. Deenei laa, gidaadou la gi haga madammaa ina gidaadou gi daha mo nia mee huogodoo ala e haga milimilia tadau huaidina mo tadau hagataalunga. Gidaadou la gi noho dabu mo di hagalaamua ina a God.

### Di tene o Paul

<sup>2</sup>Goodou gi mamaanadu ina gimaua i godou lodo. Gimaua digi hai di mau mee huaidu gi tangada e dahi, be gu haga hala tangada e dahi, be gu halahalau tangada e dahi. <sup>3</sup>Au hagalee ne helekai beenei belee hagahuaidu goodou. Idimaa, i mua au gu helekai beenei, goodou i lodo dogu manawa, deela laa e buni ai gidaadou i lodo tadau mouli be i lodo tadau mmade. <sup>4</sup>Dogu hagadagadagee adu gi goodou, la koia e damanaiee, gei au e hagaamu goodou. I lodo mau hagaduadua huogodoo, gei au nogo duu maaloo, gei au gu tentene huoloo. <sup>5</sup>Di mau dau adu gi Macedonia, gimaua digi hagamolooloo. Nia madagoaa huogodoo e

<sup>q</sup> 6.16: Lev 26.12; Ezek 37.27; 1 Cor 3.16, 6.19    <sup>r</sup> 6.17: Is 52.11    <sup>s</sup> 6.18: 2 Sam 7.14; 1 Chr 17.13; Is 43.6; Jer 31.9

haingadaa, e lagalagamaaloo gimaua mo nia daangada, gei di madagu i mau lodo.<sup>t</sup> <sup>6</sup>Go God dela e hagamaaloo aga digau huogodoo ala e daamaha nadau lodo, geia gu haga tentene labelaa gimaua i di dau mai Titus gi mau baahi. <sup>7</sup>Gei hagalee dono dau mai la hua dela ne haga tentene gimaua, gei mo dono haga iloo hogi di godou hai ne hagamaaloo aga ia. Mee gu hagi mai gi gimaua di godou hidihidi huoloo i di au, mo di godou manawa gee, mo di godou hiihai e hagadagaloaha au. Aanei nia mee ne haga damana aga dogu tene. <sup>8</sup>Maa dagu lede dela ne hagu adu gi goodou la gu haguhaidu goodou, gei au hagalee lodo huaidu i dagu hai di lede deenei. Gei au e mee hua di lodo huaidu i dagu longono bolo goodou gu manawa gee gi dagu lede i tama madagoaa hua bodobodo. <sup>9</sup>Dolomeenei gei au gu tentene, gei hagalee bolo e tene gi dagu hai goodou gi manawa gee, au e tene gi di godou manawa gee, dela ga hidi mai ai goodou ga oongo godou lodo, ga huli hoou. Go God dela ne hai hegau gi di godou manawa gee deela, deela laa, gimaua deai di mau mee huaidu ne hai adu gi goodou ai. <sup>10</sup>Di manawa gee dela e hai hegau ai a God, le e hidi mai ai di huli hoou o tangada, ga hidi ai di haga mouli, gei deai tangada e manawa gee ginai ai. Gei di manawa gee o henuailala le e hidi ai di made. <sup>11</sup>Goodou gi mmada malaa gi di mee a God dela ne hai adu gi goodou mai i godou manawa gee. Dolomeenei gei goodou gu haga madabouli mo di hagamahi di haga modongoohia aga godou donu, mo di godou lodo huaidu gi di mee huaidu, mo di godou haga lliga, mo di godou hidihidi, mo di godou maanadu mai au, mo di godou hiihai e hagaduadua digau ala e hai di huaidu. Goodou gu haga modongoohia aga bolo goodou e madammaa i nia mee huogodoo aanei. <sup>12</sup>Gei au ne hihii adu di lede deela gi goodou, la hagalee ne hai mai i tangada dela gu hai dana mee hala, be tangada dela gu hai ginai di hala. Au ne hihii di lede deela bolo gi gidee ai goodou di godou haa manawa i gimaua, i mua nia hadumada o God. <sup>13</sup>Deela di mee gu maaloo dangihi ai mau lodo.

Mau lodo gu maaloo aga, gei gimaua hogi gu tentene huoloo gi di godou hai dela ne haga tentene a Titus i dono madagoaa nogo i godou baahi. <sup>14</sup>Au gu hagaamu goodou ang gi Titus, gei au hagalee langaadia eau dogu hagaamu goodou. Gimaua nogo helehelekai adu gi goodou i nia mee ala e donu i nia madagoaa huogodoo, dela gadoo di mau hagaamu goodou ang gi Titus gu modongoohia aga bolo e donu. <sup>15</sup>Malaa, dono aloho i goodou gu damana aga i dono mamaanadu godou manawa hagalongo, mo di godou benebene ia hagalabagau huoloo. <sup>16</sup>Deela laa, au e tentene huoloo, idimaa, au e mee di hagadagadagagee adu gi goodou i nia mee huogodoo.

---

<sup>t</sup> 7.5: 2 Cor 2.13

### Tigidaumaha nia dama a Christ

**8** <sup>1</sup>Mau duaahina nei, gimaua e hiihai bolo goodou gi iloo di hai o tumaalia o God, dela ne hai gi nia nohongo dabu ala i Macedonia. <sup>2</sup>Digaula gu noho i lodo nia hagamada haingadaa llauehe, gei digaula gu tentene huoloo, dela ga hai di nadau tigidaumaha wanga dehuia, mai i lodo nadau hagaloale. <sup>3</sup>Au e hagi adu bolo digaula ne dahi aga nadau mee ala ne mee ge gu logo gi nonua. Mai lodo nadau hiihai, <sup>4</sup>digaula e tangi mai gi gimaua bolo gi kae ina nadau tigidaumaha, e hagamaamaa nia dama o God ala i Judea. <sup>5</sup>Digaula ne hai nia mee aanei gu hidi laa hongo mau mee ala ne hagamaanadu bolo aalaa nadau mee ga mee di hai. Matagidagi, gei digaula ne dugu anga ginaadou gi Dimaadua, nomuli, mai gi gimaua labelaa mai di manawa o God. <sup>6</sup>Deenei di mau mee e hagamaaloo ai Titus dela ne daamada aga tegau deenei, bolo ia gi hagamaamaa ina goodou e haga lawa ai tegau o di aloho deenei. <sup>7</sup>Goodou gu maluagina huoloo i nia mee huogodoo ala i godou baahi: di hagonu, nia helekai, di kabemee, di hagamadabouli, di hagamaamaa, mo di godou aloho i gimaua. Goodou gi heia hua beelaa tegau o di aloho deelaa. <sup>8</sup>Ma hagalee taganoho dela e gowadu ko au gi goodou. Go dogu hiihai hua belee haga modongoohia adu nia hagamadabouli o digau ala i golo i di hagamaamaa, deenei dagu mee dela e halahala be di godou aloho le e donu be deesai. <sup>9</sup>Goodou e iloo tumaalia o tadau Dagi go Jesus Christ: i dono maluagina huoloo, geia gu hai ia gi hai be tangada hagaloale i goodou, bolo gi maluagina goodou. <sup>10</sup>Dagu maanadu la bolo ma e humalia e haga lawa dolomeenei di godou mee dela ne daamada i di ngadau ne hana. Ma go goodou matagidagi, hagalee ne hai hua di maa, gei ne hiihai labelaa bolo e hai di maa. <sup>11</sup>Deelaa laa, goodou gi heia gei gi hagaodia, goodou hagamahi heia gi lawa di godou mee dela gu lawa di haganoho i mua, mai i godou mee ala e mee di hai mai i lodo godou maluagina. <sup>12</sup>Maa goodou ga tene gi di wanga gi daha, gei God e tene gi godou mee ala e mee di godou wanga gi daha, gei hagalee i godou mee ala e deemee di wanga gi daha. <sup>13-14</sup>Au hagalee hai digau ala i golo gi maamaa i dagu dugu nia mee daamaha gi godou nua, ma e humalia bolo goodou e hagamaamaa digau ala e dee dohu nadau mee, idimaa goodou e logo godou mee dolomeenei. Gei digaula ga hagamaamaa goodou i di godou madagoaa ma ga dee dohu godou mee, gei digaula e logo nadau mee. Deenei di hai e hagatongaadahi goodou mo digaula. <sup>15</sup>E hai be telekai ne hihi i lodo di Beebaa Dabu boloo, “Tangada dela ne hagabudu ana mee e logo, la hagalee logowaahee, gei tangada dela ne hagabudu ana mee hogoohi, la hagalee hogoohi loo.””

<sup>u</sup> 8.1-4: Rom 15.26    <sup>v</sup> 8.15: Ex 16.18

### Titus mo ono ehoo

<sup>16</sup> Gimaua e danggee ang gi God i dana haga honu Titus gi di manawa hiihai huoloo e hagamaamaa goodou, gadoo be gimaua. <sup>17</sup> Gei hagalee bolo go di mau dangidangi ang gi mee dela gei mee ga hai nia mee aanei, gei go dono hiihai hua bolo ia e hagamaamaa goodou, gei dela ne hanaduiei mee gi godou baahi, go mee hua bolo ia e hanadu. <sup>18</sup> Gei gimaua e hagau adu di mau duaahina dela e hagalabagau go nia nohongo dabu huogodoo i dana agoago di Longo Humalia. <sup>19</sup> Gei hagalee bolo deenei hua, gei nia nohongo dabu gu hilihili aga a mee, bolo gi hana madalia gimaua e dagidagi nnegau o di aloho deenei dela e haga madamada ai Dimaadua, gei e haga modongoohia ai di mau hiihai e hagamaamaa. <sup>20</sup> Gimaua e hagamaahi e hai gi hai hegau donu, bolo gi dee leelee logo nia daangada i di gili di tigidaumaha damanaiee, dela e benebene i mau baahi. <sup>21</sup> Deenei di mau hagamaanadu bolo e hai gi donu nia mee huogodoo, hagalee bolo i mua hua nia golomada o Dimaadua, gei i mua labelaa nia golomada o nia daangada.<sup>w</sup> <sup>22</sup> Gimaua e hagau adu labelaa di mau duaahina dela ga madalia meemaa. Gimaua gu hagdina haga logowaahee dono modo gologolo mo dono hagamadabouli gi nnegau e logo, gei gimaua gu iloo bolo mee e hiihai huoloo e hagamaamaa. Dolomeenei gei mee e hiihai huoloo e hagamaamaa goodou, i dono hagdagadagagee huoloo adu gi goodou. <sup>23</sup> Gei Titus, go mee dela go dogu ihoo mo dogu hagamaamaa dela nogo madalia au nogo ngalua e hagamaamaa goodou. Meemaa ala i golo, ala gu lloo adu labelaa, aalaa meemaa e hagau go nia nohongo dabu belee haga madamada ai a Christ. <sup>24</sup> Deenei laa, goodou gi haga modongoohia aga ina godou aloho gi digaula bolo gi modongoohia ai nia nohongo dabu huogodoo, gei gi iloo bolo di mau hagaamu goodou le e donu.

### Di hagamaamaa gi digau hagdou

**9** <sup>1</sup> Ma hagalee bolo au e hai loo gi hagi adu gi goodou di hagamaamaa dela ne hagau ang gi nia dama a God ala i Judea. <sup>2</sup> Au e iloo bolo goodou e hiihai e hagamaamaa, gei au gu hagaamu goodou gi digau o Macedonia, i dogu hai gi digaula boloo, “Tadau duaahina ala i Achaia gu hagatogomaalia e hai di nadau hagamaamaa mai di ngadau dela ne hana.” Malaa, di ala mee deenei gu haga ngalua aga digau dogologo i lodo digaula.<sup>x</sup> <sup>3</sup> Au ga hagau adu tadau duaahina aanei bolo di mau hagaamu goodou i nia mee aanei, la gi de dilikai, i dagu helekai dela ne hai bolo goodou gu hagatogomaalia di godou hagamaamaa. <sup>4</sup> Maa nei bolo digau o Macedonia ga lloo adu madalia au, la ga gidee bolo goodou digi

<sup>w</sup> 8.21: Prov 3.4    <sup>x</sup> 9.2 Di waahale go Corinth la i lodo tenua go Achaia

hagatogomaalia godou mee, malaa, gei gimaua la ga langaadia huoloo, idimaa, di mau hagadagadagagee la gu damanaiee huoloo adu gi goodou, gei goodou hogi ga langaadia. <sup>5</sup>Deenei laa au ne hagamaanadu bolo e humalia e hai dagu dangidangi ang gi tadau duaahina aanei bolo digaula gi lloo adu gi goodou i ugu mua e hagatogomaalia di godou hagamaamaa dela gu lawa ai di godou hagababa, gei nia mee huogodoo gi togomaalia i dogu madagoaa dela ma ga dau adu gi godou baahi. Deelaa di madagoaa e kila aga ai godou mee ala ne dahi aga, ala ne hai mai i lodo godou manawa humalia, hagalee ne hai hagakono. <sup>6</sup>Goodou gi langahia tangada dela e dogi ana lii laagau hogoohi, ia e hadi ana hua laagau hogoohi. Gei tangada dela e dogi ana lii laagau e logo, ia e hadi ana hua laagau e logo. <sup>7</sup>Tangada nei mo tangada nei gi dahi aga ina ana mee ala gu lawa ai di hagababa mai i ono lodo, hagalee bolo e hai hua tegau bolo gi heia, gei God le e aloho i tangada dela e tene di wanga ana mee gi daha. <sup>8</sup>Gei God e mee di gowadu gi goodou ana mee gi logo i godou mee ala e hiihai ginai, bolo goodou la gi dohu i nia madagoaa huogodoo, mo anga labelaa gi nia hegau humalia ala i golo, <sup>9</sup>be di mee dela gu lawa ai di hihi i lodo di Beebaa Dabu boloo, “Mee e wanga dehuia gi digau ala hagaloale, gei dono dumaalia e hana hua belaa.”<sup>y</sup>

<sup>10</sup>God e wanga gi digau hai hadagee nia lii laagau e dogi mo nadau palaawaa e gai, gei go mee hogi dela e gowadu gi goodou nia lii laagau huogodoo ala e hiihai ginai goodou, ga haga tomo aga nia maa, bolo gi hai nia hua laagau e logowaahee mai i godou dumaalia.<sup>z</sup> <sup>11</sup>Gei mee ga hai goodou gi maluagina huoloo i nia madagoaa huogodoo, bolo goodou gi mee di wanga gi daha i nia madagoaa huogodoo ga hidi mai digau dogologo ga danggee gi God i godou wanga dehuia ala ga kae go digaula mai tadau baahi. <sup>12</sup>Idimaa, tegau o di hagamaamaa deenei dela e hai go goodou, hagalee bolo e hagamaamaa hua nia dama a God, gei e hidi mai di hai danggee ang gi God mai i digau dogologowaahee. <sup>13</sup>I di nadau gidee donu tegau o di hagamaamaa deenei, digau dogologowaahee ga haga hagaamu a God i di godou hagamahi gi di Longo Humalia o Christ dela gu haga modongoohia go goodou, mo godou dumaalia i di godou wanga dehuia ang gi digaula mo digau ala i golo. <sup>14</sup>Gei digaula ga dalodalo i goodou mai i lodo nadau manawa aloho, i tumaalia damanaiee dela ne gowadu go God gi goodou. <sup>15</sup>Gidaadou gi hagaamuina a God i dana wanga dehuia hagalabagau deenei.

### Paul e abaaba ana hegau

**10** <sup>1</sup>Au go Paul, e hiihai e hai dagu dangidangi adu gi goodou. Hunu daangada e hai bolo au tangada e daudonu mo di hila gi lala i

<sup>y</sup> 9.9: Ps 112.9    <sup>z</sup> 9.10: Is 55.10

dogu noho i godou baahi, gei e wou i dogu madagoaa ma ga mogowaa i goodou. Au e dangi hagamahi adu gi goodou i di manawa aloho mo tumaalia o Christ, <sup>2</sup> bolo gi hudee heia au gi wou adu gi goodou i dogu madagoaa ma ga dau i godou baahi. E donu, au e wou ang gi digau ala e haihai bolo mau hangaahaihai la go nnangaahai o henuailala. <sup>3</sup> E donu bolo gimaua e noho i henuailala, gei gimaua hagalee e heebagi be nia hangaahai o henuailala. <sup>4</sup> Nia goloo heebagi ala e heebagi ai gimaua, la hagalee nia goloo ni henuailala, go nia goloo mogobuna o God ala e oho ai nia abaaba mau dangihi, gei aalaa hogi e oho ai nia helehelekai lagalagamaaloo hala. <sup>5</sup> Gimaua e dugudugu ia gi lala nia hagamuumua huogodoo ala e hai baahi gi di kabemee a God. Gimaua e lawalawa nia hagamaanadu huogodoo gi mee di hagalongo ang gi Christ. <sup>6</sup> Goodou ga hai digau hagalongo, gei gimaua ga hagaduadua digau huogodoo ala hagalee hagalongo. <sup>7</sup> Goodou e mmada hua gi nia mee ala e kila mai i mua godou golomada. Maa tangada ga hai bolo ia di tama ni Christ, geia gi maanadu ina labelaa bolo gimaua nia dama ni Christ labelaa gadoo be ia. <sup>8</sup> Au hagalee langaadia, maeaha maa au gu iehe dagu hagaamu nia mogobuna o Tagi ala ne dugu mai gi gimaua, go nia mogobuna ala e hagahumalia ai goodou, hagalee go nia mogobuna ala e hagahuaidu goodou. <sup>9</sup> Au hagalee hiihai bolo goodou gi heia au bolo au e hagamadagudagu goodou gi agu lede. <sup>10</sup> Holongo tangada ga helekai aga e hai boloo, “Nia lede a Paul la gu maaloo dangihi balua, gei mee ma ga i tatau baahi, mee tangada hua bagege, ana helekai le e- paagege.” <sup>11</sup> Tangada dela e hai beenei la gi iloo ia bolo ma hagalee hai geegee i mehanga mau mee ala e hihi adu gi goodou i di mau mogowaa loo i goodou, mo mau mee ala e hai adu gi goodou i mau madagoaa ma ga noho i godou baahi. <sup>12</sup> E donu bolo gimaua hagalee hagatautau gimaua ang gi digau ala e bida hagaamu ginaadou. Digau hua boiboi ala e bida hai nadau mee e hagatau ang gi ginaadou, ala hogi e bida hagi aga ginaadou gi nadau mee ala ne hai go ginaadou. <sup>13</sup> Gei gimaua hagalee bida hagaamu gimaua gi hidi laa hongo di mau duhongo hegau dela gu dugu mai go God, mo mau hegau i godou baahi. <sup>14</sup> Di mau madagoaa ne lloo adu gi godou baahi, goodou e noho i lodo tegau deenei dela gu lawa di haga noho, gei gimaua hagalee ne hula laa hongo tegau deenei, dela bolo e gowadu di Longo Humalia i di hai o Christ. <sup>15</sup> Gimaua hagalee hagaamu nia hegau ala ne hai go digau ala i golo, i tua nia hegau a God ala ne haga noho ga gaamai gi gimaua. Gei gimaua e hagadagadagagee bolo godou hagadonu le e maaloo aga mo mau hegau ala e hai i godou baahi ga tomo aga labelaa, be di hai o nnegau a God ala gu dugu mai gi gimaua. <sup>16</sup> Gei gimaua ga mee di hula e agoago di Longo Humalia gi lodo nia henua ala i golo i daha mo goodou, gei gimaua hagalee hagaamu tegau o tuai dangada dela ne hai i lodo nia henua aalaa. <sup>17</sup> Di Beebaa

Dabu e helekai boloo, “Maa tangada bolo ia e hagaamu i dahi mee, geia gi hagaamuina di mee a Dimaadua dela ne hai.”<sup>a</sup> <sup>18</sup>Hagalee go tangada dela e bida hagaamu ia dela e hagahumalia i baahi o Dimaadua, gei go tangada dela gu hagaamu go Dimaadua.

**Paul mo nia daangada agoago hagau dilikai**

**11** <sup>1</sup>Au e hiihai bolo goodou gi dumaalia mai gi di au be au e leelee be tangada dadaaulia, gei au e iloo bolo goodou ga dumaalia mai. <sup>2</sup>Au e dubua adu gi goodou e hai gadoo be God dela e dubua adu gi goodou. Goodou e hai gadoo be tama ahina madammaa dela ne hagababa ang gi taane hai lodo hua e-dahi, deela go Christ. <sup>3</sup>Au e lliga bolo godou hagamaanadu gi dee hai hala hua, ga kili gi daha godou haa manawa madammaa i Christ, gadoo be Eve dela ne halahalau go di kabemee tilikai o di gihaa.<sup>b</sup> <sup>4</sup>Idimaa, goodou e dumaalia hua ang gi tei dangada dela ma ga hanadu gi godou baahi, e agoago adu tuai Jesus i daha mo di mau mee dela gu lawa di agoago adu gi goodou. Goodou ga kae tuai hagataalunga mo tuai longo humalia ala e hai gee huoloo mo di Hagataalunga mo di Longo Humalia ala ne kae go goodou i mau baahi! <sup>5</sup>Au digi maanadu loo bolo au i bahi i-lala digau ala e hai ginaadou bolo digau agoago hagau aamua. <sup>6</sup>Holongo au tangada dee dohu i di helekai, gei hagalee bolo au e de kabemee. Gimaua gu haga modongoohia adu gi goodou nia mee aanei, i lodo nia madagoaa huogodoo i nia haihai huogodoo. <sup>7</sup>Au gu agoago adu de huia gi goodou di Longo Humalia a God. Au gu dugu ia au gi lala belee hagalaamua goodou. Ma e hala dagu hai beenei? <sup>8</sup>I dogu ngalua i godou baahi, gei nia nohongo dabu ala i golo e hui au. E ala be au e gaiaa mai nia bahihadu digaula, e hagamaamaa goodou. <sup>9</sup>Gei dogu noho i godou baahi, gei au digi haga daadaamee goodou i nia teenedi belee hai ai dogu hagamaamaa. Aalaa hua go tadau duaahina ala ne loomoi i Macedonia ne gaamai nia mee huogodoo ala e hiihai ginai au. I lodo hua nia madagoaa ala gu too gi daha, gei au digi hai goodou gi lodo daamaha. Tugi dolomeenei ga huli gi muli, au hagalee hai goodou gi lodo daamaha!<sup>c</sup> <sup>10</sup>Mai i di tonu o Christ dela i ogu lodo, au e hagababa adu gi goodou bolo deai tangada i lodo tenua go Achaia e mee di dugu dogu hagaamu deenei ai. <sup>11</sup>E hai behee? Au e helekai beenei, idimaa au hagalee e aloho i goodou? God e iloo bolo au e aloho i goodou! <sup>12</sup>Agu hegau aanei e hai, aalaa go agu mee ga hai gi muli bolo “digau agoago hagau” ala i golo gi deemee di hagaamu ginaadou ge e hai hua bolo nadau hegau le e hai gadoo be mau hegau. <sup>13</sup>Digau aanei la hagalee digau agoago hagau e donu, digau agoago hagau hua dilikai e bida haga kila aga ginaadou gi hai be digau agoago hagau

<sup>a</sup> 10.17: Jer 9.24   <sup>b</sup> 11.3: Gen 3.1-5, 13   <sup>c</sup> 11.9: Phil 4.15-18

ni Christ. <sup>14</sup>Gei hagalee di mee e haga goboina deenei, idimaa, Satan e mee hua di bida haga gila aga ia gi hai be tangada di langi o di maalama. <sup>15</sup>Deenei laa, e hagalee haga goboina maa ana gau hai hegau ga bida haga kila aga ginaadou gi hai be digau ala e hai hegau gi di tonu. Gei di hagaodi ginaadou e kae nadau hui gi tau ang gi nadau hangaahaihai.

### Nia hagaduadua Paul

<sup>16</sup>Au e helekai adu labelaa gi goodou bolo goodou hudee hai bolo au e dadaaulia. Maa goodou ga dugu au bolo au e dadaaulia, gei goodou gi benebene ina hua au gi godou baahi be di godou benebene tangada dadaaulia, gi iai dagu mee duli e haga hagaamu ko au. <sup>17</sup>Agu helekai aanei e helehelekai iei au, la hagalee go nnelekai a God bolo gi helekai ai. Go dogu hagaamu hua i ogu lodo ne daamada mai i lodo dogu dadaaulia. <sup>18</sup>Idimaa e dogologo ala e bida haga hagaamu ginaadou be nia hangaahaihai o henuailala, gei au hogi e hai be digaula. <sup>19</sup>Goodou e hagakono godou lodo ang gi digau dadaaulia mai i godou kabemee! <sup>20</sup>Goodou e manawa hagakono labelaa gi digau ala e hai goodou be nia hege, gei e hiihai e hai nadau huaidu adu gi goodou, e kae godou goloo, be e haga balumee goodou, be e paapaa godou gauwae. <sup>21</sup>Au e langaadia di hai bolo gimaua ne deemee di hai nia maa! Maa iai tangada e bida hagaamu ia i di mee, gei au e hagaamu au labelaa! Au e helekai gadoo be tangada dadaaulia. <sup>22</sup>Malaa e hai behe? Digaula digau o Hebrew? Gei au hogi tangada o Hebrew. Digaula digau Israel? Gei au hogi tangada o Israel. Digaula digau ni di madawaawa o Abraham? Au hogi tangada ni di madawaawa o Abraham. <sup>23</sup>Digaula la nia hege ni Christ? Au e helekai gadoo be tangada e laba, gei au di hege koia e mada humalia i digaula, idimaa, au gu ngalua mada damana i digaula. Au gu lawalawa haga logo i digaula. E logo ogu holongo i digaula gei au gu dadaaligi hagahuaidu. E logo ogu holongo gei au gu hai bolo au ga made hua.<sup>d</sup> <sup>24</sup>Nnolongo e lima gei digau o Jew ne haga mamaawa au haga motolu maa hiwa.<sup>e</sup> <sup>25</sup>Nnolongo e dolu, gei digau o Rome ne haga mamaawa au, tolongo e dahi gei au ne dilidili gi nia hadu. Nnolongo e dolu, gei au gu abulu i hongo nia wagabaalii. Tolongo e dahi, gei au nogo wanuwanu i di moana i di boo e dahi ge dahi aa.<sup>f</sup> <sup>26</sup>Au gu tale gi nia haingadaa e logo i lodo dogu heehee i lodo nia monowai, i baahi digau gaiaa, i baahi ogu gau digau o Jew, mo i baahi digau tuadimee. Au gu tale gi nia haingadaa i lodo nia gowaa huogodoo i lodo nia waahale, lodo henua, lodo di moana, mo i baahi ogu ihoo hua gee.<sup>g</sup> <sup>27</sup>Ogu ngalua llauehe ge haingadaa i golo, nnolongo e logo gei au ne haga

<sup>d</sup> 11.23: Acts 16.23    <sup>e</sup> 11.24: Deut 25.3    <sup>f</sup> 11.25: Acts 16.22, 14.19

<sup>g</sup> 11.26: Acts 9.23, 14.15

ala i di boo, gu hiigai, gu hiieinu, agu meegai ai, dogu gowaa e moe iei au ai, ge ogu goloo ai. <sup>28</sup>Gei i daha mo nia mee aanei ala e tale mai gi di au, i nia laangi huogodoo gei au gu lodo daamaha dogu madamada humalia i nia nohongo dabu huogodoo. <sup>29</sup>Maa iai tangada e lodo huaidu, gei au hogi e lodo huaidu. Maa iai tangada e doo gi lodo di hala, gei au e manawa gee gi mee. <sup>30</sup>Maa au belee hagaamu au gi dahi mee, gei au ga hagaamu hua au i nia mee ala e haga modongoohia aga ai dogu bagege. <sup>31</sup>Di God Tamana o tadau Dagi go Jesus Christ, gi hagaamuina a mee ga hana hua beelaa, go mee dela e iloo ia bolo au hagalee kai tilikai. <sup>32</sup>Dogu noho i Damascus, gei di gobinaa o di king go Aretas gu hagaloohi nia bontai huogodoo o di waahale deelaa bolo e kumi au.<sup>h</sup> <sup>33</sup>Gei au gu haga hege ia i lodo di gada laa lodo di bongoo di abaaba o di hale, ga hana gi daha mo mee.

### Nia moe a Paul mo ana haga modongoohia

**12** <sup>1</sup>Au e hai gi hagaamu au, maeaha maa deai ono humalia ai, gei au e haga modongoohia aga agu moe mo nia mee ala ne haga modongoohia mai go Tagi. <sup>2</sup>Au e iloo tangada hagadonu a Christ dela gu hagatanga, gu hana gi nua, gu tugi i di langi mugi nua nia ngadau madangaholu maa haa gu too gi daha. (Au e de iloo be di maa di mee ne hai, be di maa di moe hua, ma go God hua dela e iloo ia.) <sup>3-4</sup>Au e iloo bolo tangada deenei la ne hana gi nua gi Paradais. (Gei au e de iloo be di maa di mee ne hai, be di maa di moe hua, ma go God hua dela e iloo ia.) Gei mee ne hagalongo hua gi nia mee ala e deemee di helekai ai, go nia mee ala e deemee di helekai nia daangada mai i nadau ngudu. <sup>5</sup>Gei au e hagaamu tangada deenei, hagalee hagaamu au, go nia mee hua e haga modongoohia aga dogu bagege. <sup>6</sup>Maa nei bolo au ma ga bida hagaamu au, gei au la hagalee hai be tangada boiboi, idimaa, agu helekai le e donu. Gei deesai, au hagalee bida hagaamu au, idimaa, au hagalee hiihai bolo tangada gi hudee dugu ina au bolo au tangada aamua i ana mee ala ne gidee ia i dogu baahi, ge ne longono mai i di au. <sup>7</sup>Bolo au gi dee hagaamuina au i nia mee haga goboina ala ne mmada ginai au, di ngudu mee duia le e daalo mai dogu huaidina, e hai gadoo be di mee kae hegau a Satan dela e hagaduadua au, belee dugu dogu hagaamu au. <sup>8</sup>Nnolongo e dolu, gei au ne dangidangi ang gi Tagi bolo gi daawa gi daha di ngudu mee duia dela e daalo mai au. <sup>9</sup>Gei mee ga helekai mai, ga hai, “Dogu dumaalia la gu dohu adu gi di goe, idimaa, ogu mogobuna gu kila aga i baahi digau paagege.” Deenei dagu mee gu tentene huoloo ginai au i dogu hagaamu dogu bagege, bolo au gi longono eau nia mogobuna o Christ i dogu baahi. <sup>10</sup>Deenei di mee e tentene huoloo iei au, i lodo

<sup>h</sup> 11.32-33: Acts 9.23-25

ogu madaogaa bagege, ogu hagahuaidu, ogu haingadaa, dadaaligi, hagaduadua i di gili o Christ. Dogu madagoaa ma ga bagege iei au, deelaa di madagoaa e maaloo iei au.

### Di manawa gee Paul i digau Corinth

<sup>11</sup>Au gu hai gadoo be tangada boiboi. Go goodou dela ga hai ei au beenei. Ma go goodou ala digau ne belee haga modongoohia aga di godou hiihai mai gi di au, idimaa, maeaha maa au hagalee di mee, gei au hagalee i bahi i-lala godou “gau agoago hagau”. <sup>12</sup>Nnagadilinga mogobuna mono mee haga goboina huoloo la gu lawa di hai ko au i godou baahi i di manawa hagakono, bolo gi modongoohia ai goodou bolo au tangada agoago hagau donu. <sup>13</sup>Goodou gu haingadaa i baahi nia nohongo dabu ala i golo, gei au digi hagamaamaa ina goodou i baahi gi di bahihadu? Goodou ga dumaalia mai gi di au! <sup>14</sup>Deenei tolu holongo belee hanadu iei au gi godou baahi, gei au hagalee hanadu belee haga daamaha goodou. Hagalee go godou bahihadu ala e hiihai ginai au, gei go goodou. Hagalee go nia dama ala e hagahumalia nadau maadua, gei go nia maadua ala e hagahumalia nadau dama. <sup>15</sup>Au e tentene bolo au e gowadu ogu goloo huogodoo mo dogu huaidina bolo au e hagamaamaa goodou. Malaa, e hai behee? Godou aloho i di au la ga dului mai, i di au dela e damana dogu aloho i goodou? <sup>16</sup>Malaa, goodou e baba hua bolo au hagalee ne haga daamaha goodou. Holongo iai tangada ga hai bolo au tangada huaidu, e halahalau goodou. <sup>17</sup>E hai behee? Au gu kae dagu mee i goodou mai i agu gau kae hegau ala ne hagau adu gi godou baahi? <sup>18</sup>Au ne dangi anga hagamahi gi Titus bolo gi hanadu, ga dangi anga labelaa gi tadau duaahina dela i golo gi hanadu dalia a mee. Malaa, goodou e hai bolo aha, ma go Titus dela ne kae ana mee i goodou? Gimaua mo Titus la hagalee e ala be di hagataalunga e dahi, be nnangaahaihai hua be di mee e dahi? <sup>19</sup>Holongo goodou e hagamaanadu bolo gimaua e abaaba gimaua i godou mua. Deeai, gimaua e helehelekai hua i mua nia golomada o God, be di hiihai o Christ i nia mee huogodoo ala nogo helekai ai gimaua adu gi goodou. Ogu ihoo hagaaloho, nia mee huogodoo ala e hai go gimaua, e hai belee hagamaamaa goodou. <sup>20</sup>Dagu mee e lliga huoloo iei au bolo au gi dee hanadu hua gi godou baahi, ga de gidee au dagu mee dela e hiihai ginai au i godou baahi, gei goodou hogi ga de gidee di godou mee dela e hiihai ginai goodou i dogu baahi. Gei au e lliga gi dee gila adu hua au, ga gidee goodou e heheebagi, dubua, lagamaaloo, tee buni, tamu dangada, leelee logo hagamuamua, ge hagalongoaa. <sup>21</sup>Au e lliga bolo di madagoaa au ma ga hanadu labelaa gi godou baahi, God gi dee haga langaadia ina au i godou mua, gei au e manawa gee i digau ala gu hai di huaidu i mua, gei digi huli nadau lodo i nadau hai huaidu, manawa manu, mo di hai be di manu.

### Nia bule mo nnagaaloho hagamuliagina

**13** <sup>1</sup>Deenei tolu holongo ga hanadu iei au gi godou baahi. Di Beebaa Dabu e helekai boloo, “Nia mee huogodoo e hai gi haga modongoohia gi donu mai i baahi nia daangada dogolua be dogodolu.”<sup>i</sup> <sup>2</sup>Au gu hai adu gi goodou nia mee aanei i mua i dogu lua holongo ne hanadu iei au gi godou baahi. Gei au e haga langahia labelaa adu gi goodou i dogu madagoaa dela e de igolo i godou baahi, bolo dogu madagoaa dela ma ga hanadu labelaa gi godou baahi, deai tangada i digau ala ne hai nadau ihala i mua e mee di tanga gi daha mo di hagaduadua ai. <sup>3</sup>Goodou ga iloo bolo Christ le e helekai mai i di au, geia hagalee bagege dono hai hegau i godou baahi, geia e hagi aga ono mahi adu gi goodou. <sup>4</sup>Mee ne daudau i di loobuu i dono bagege, gei mee gu mouli i nia mogobuna o God. Gimaua hogi e paagege madalia a mee, gei gimaua hogi e mouli madalia a mee i nia mogobuna o God i di mau hai hegau adu gi goodou. <sup>5</sup>Hagadina ina goodou be goodou digau e noho i di mouli hagadonu. Goodou gu iloo bolo Christ le e noho i godou lodo? Maa goodou ga de iloo goodou, e hai be di mee goodou gu magedaa di hagadina goodou. <sup>6</sup>Gei au e hagadagadagagee huoloo bolo goodou e iloo hua bolo gimaua hagalee kili gi daha mau hagadonu. <sup>7</sup>Gimaua e dangi ang gi God bolo goodou gi hudee heia nia mee huaidu, gei hagalee bolo gi humalia gimaua i mua nia daangada, gei bolo goodou gi heia nia mee ala e donu, maeaha e hai bolo gimaua e huaidu. <sup>8</sup>Idimaa, gimaua e deemee di hai mau mee ala e hai baahi gi di tonu, e mee hua di hai mau mee ang gi di tonu. <sup>9</sup>Gimaua e tentene huoloo i di mau paagege, gei goodou e maaloo! Gei deenei di mau mee e tangi ai gi God bolo gi heia goodou gi odi anga. <sup>10</sup>Au e hihi adu nia mee aanei i dogu madagoaa dela e mogowaa i goodou, bolo di madagoaa dela ma ga dau adu iei au gi godou baahi, gei au gi dee leelee maaloo adu gi goodou i dogu hai hegau au i nia mogobuna o Tagi ala ne dugu mai gi di au. Malaa, nia mogobuna ala e hagahumalia adu gi goodou, hagalee nia mogobuna e hagahuaidu ai goodou.

### Nia hagaaloho hagaodi

<sup>11</sup>Ogu duaahina nei, au e hai dagu hagaaloho adu gi goodou. Goodou gi hagamahi huoloo. Goodou halalongo gi agu mee aanei ala ne hagi adu gi goodou. Goodou gi buni di manawa e dahi, noho i di aumaalia, gei di aloho mo di noho i di aumaalia o God ga noho i godou baahi.

<sup>12</sup>Goodou gi hagadau hagaaloho i godou mehanga gi di hagaaloho o nia dama a Christ.

<sup>i</sup> 13.1: Deut 17.6, 19.15

Nia dama a God huogodoo e hai di nadau hagaloho adu gi goodou.

<sup>13</sup>Tumaalia o tatau Dagi go Jesus Christ, mo di aloho o God, mo di hagadaubuni o di Hagataalunga Dabu gi madalia goodou huogodoo.